



Pareri dal president

Caras commembras, stimai commembers

Miu pareri d'igl onn vargau ei staus sgarscheivel liungs e lads, perquei lessel jeu propi tener en l'empermischun fatga da lez temps e schanegiar vus uonn da talas scrivanzas senza fin e misericordia.

Igl ei strusch da crer, denton mi'emprema perioda d'uffeci sco president dall'Uniun Rumantscha Rezia Bassa ei gia passè, quels treis onns ein sparrì en in dus ed ei vala puspei da far patratgs pil futur, sedumandar sche ulteriurs 3 onns alla testa dall'uniun e la lavur ch'ei necessaria persunter cunterfan buc allas pretensiuns persunalas ni vegnan insumma giavischadas e honoradas dils commembers, dallas commembras. Ils medems patratgs han naturalmein era mes dus consuprastonts fatg.

Lein denton, avon che guardar el futur, far in cuort e tuttavie empauet frustront sguard anavos el passau.

Retrospectiva 2020

Radunonza generala

In punct culminont, ed era empauet commuentont, dalla radunonza ei segir stau la surdada dalla bitgetta dil Chor maschadà Rumantsch Rezia Bassa. Stuer surdar il chor, quei suenter liungs 33 onns alla testa d'in tal, ei tuttavie nuota stau gest lev per nies dirigent d'honor Eugen Casanova. Denton, la perschasiun che "siu" chor ei vinavon en buns mauns e che la dirigenta nova Monika Arpagaus semuossa fetg motivada ed era capavla da sorprender la bitgetta, ha fatg empauet pli lev il cumiau agl Eugen.

Entschiet ha la sera cun in intermezzo musical dals musicists e cantadurs rumantschs Alexi Nay e Marcus Hobi. Silsuenter ha Hans Stricker, anteriur professer per Rumantsch alla Universitad da Turitg, teniu ina laudaziun sin il niev cudisch (Il Multè fatal) da Valentin Vincenz. Il publicum present ha en mintga cass gudiu las produziuns e gest priu la caschun d'acquistar in ni l'auter disc compact dad Alexi e Marcus ed il roman da Valentin.

Schia, jeu vaiel empermess da far cuort, ina resumada detagliada dalla radunonza 2020 saveis leger suenter el protocol da nossa actuara Lea Killias aschuntaus agl invit, perquei lessel buca entrar pli detagliu en quest pareri giudlunder.

Occurenzas

Corona, Corona, Corona ed aunc inagada Corona, quei plaid dalla miarda, quei virus smaledi ha tuttina fatschentau nus, ha fatg temas, ha mess sil tgau nossa veta usitada, quei practicamein duront igl entir onn vargau ed ei era actualmein nuota terraus diltuttatfatg.

Pitiu ha era enqual sentupada rumantscha giudlunder ed ei ha giu num spustar, ni insumma dir giu diltut, ina gronda part da quei ch'ei stau planisau. Silmeins ei nossa radunonza generala buca curdada ell'aua ed era treis ulteriuras sentupadas han giu liug, aschia che nus havein tuttina aunc astgau passentar enzacontas bialas uras en cuminonza rumantscha.

Entginas fotografias dallas paucas sentupadas passadas ein d'anflar sin nossa pagina d'internet www.reziabassa.ch.

Chor maschadà Rumantsch Rezia Bassa

Il concert communabel cul chor viril d'Aschera, il cant ella baselgia da Maiavilla, la gronda part dallas provas da cant, tut ei dau ell'aua igl onn vargau, daco stossel manegiel jeu buca menziunar.

Prevista 2021

Occurenzas

Planisar occurenzas e sentupadas per uonn ei, silmeins entochen da cheu, stau practicamein nunpusseivel.

Las perspectivas per la secunda mesadad digl onn fan denton empauet speronza e perquei ha la suprastonza tschentau ensem in tschuppel sentupadas. Fuss naturalmein bi, sch'ina gronda roschada prendess la caschun da puspei sentupar inagada ni l'autra cun la famiglia rumantscha en la diaspora. Las datas dallas occurenzas obtenis vus cun igl invit alla radunonza generala ed ein, cun ulteriuras informaziuns, era da leger sin nossa pagina d'internet.

Chor maschadà Rumantsch Rezia Bassa

Era il 2021 ha buca gest entschiet en sco giavischau, aschia ein tut las provas tochen da cheu curdadas ell'aua ed era nies concert da primavera havein stuiu spustar sin igl onn proxim. Ussa sperein semplamein che nus sappien puspei sentupar ed entscheiver cul cant sil pli tard il settember.

Nossa dirigenta ei en mintga cass fetg activa cun tarmetter notas e canzuns a cantadurs e cantaduras e vegn buca stauncla d'admonir tals, che cantar mintga di ei fetg impurtont per la vusch. Persunalmein fa la Monika tuttavie era buc siesta. Cun far cuors da direger e prender uras privatas e filar aschia vid la tecnica vegn ella segir bein-preparada all'emprema prova da cant, quei per sesez cun la speronza che cantaduras e cantadurs hagian teniu lur vuschs sin in nivel andant.

Suprastonza

Sco gia menziunau ell'introducziun da miu pareri ei in'ulteriura perioda d'uffeci gia puspei historia, ed ei vala dad eleger ina nova suprastonza per ils proxims treis onns.

Deplorablamein ha Retus Spescha dau giu sia scharscha da cassier sin la radunonza generala 2021. Jeu lessel engraziari zun fetg a Retus per sia buna lavur ch'el ha prestau ils davos treis onns per favur da noss'uniun e sperel ch'el hagi el futur buca liung'uriala senza survegnir posta, emails e telefons dil, magari empau mulestus, president.

La Lea Killias sco actuara, l'Andrea Dellner ed il Lucas Caviezel sco revisurs da quen e mia paucadat sco president essan vinavon prompts da far part alla suprastonza dall'uniun, quei cun la speranza d'obtenir era el futur igl impurtont sustegn da tuttas commembras e tuts commembers.

Ils davos treis onns han demussau che la lavur en suprastonza ei tuttavia buca da sutstimar e fa pulita bregia als treis acturs responsabels. Ord tala raschun, e per buca surcargar el vegnent ils suprastonts, ei previu d'augmentar il diember dil tgamun dall'uniun puspei sin 5 personas.

Ord quei intent fa la suprastonza, cun la speranza da survegnir il consentiment dallas commembras e dils commembers en caussa, suandontas propostas:

Proposta midada dallas statutas:

Egualitad da schlatteina:

Las denominaziuns da personas valen per omisduas schlatteinas.

Art. 9: La radunonza generala elegia il parsura, **quater** auters commembers dalla suprastonza e dus revisurs da quen (.....)

Art. 11: La suprastonza secumpona da **tschun** commembers (president, actuar, cassier e **dus consuprastonts**) (.....)

Proposta commembers da suprastonza 2021-2023:

President: Rinaldo Caduff Mols (actual)
Suprastonza: Lea Killias Ragaz Bogn (actual)
Sandro Caduff Rapperswil Jona (niev)
Fidelia Staub Ragaz Bogn (nova)
Carin Deplazes Sevelen (nova)
Revisurs: Andrea Dellner Ragaz Bogn (actual)
Lucas Caviezel Heiligkreuz (actual)

Las personas nominadas ein da capir sco proposta dalla suprastonza actuala e dueien, denter auter, era reflectar schi bein sco pusseivel la vegliadetgna da nos commembers, da nossas commembras, denton era l'egualitad da schlatteina ed aschia vinavon.

Naturalmein ei dau liber a mintga commember(a) da far ulteriuras propostas. Talas dueien, per favur, vegnidas indicadas entochen ils 7 d'uost al president.

Plaid final (vaiel gie empermess da tener cuort miu pareri)

Engraziari fetg caras commembras e prezias commembers per vossa confidanza e per las (displascheivlamein paucas) bialas uras che nus havein astgau guder ensemen igl onn passau.

Sco finiziun lessel aunc far attents vus sin nossa biala pagina d'internet www.reziabassa.ch – in clic e vus essas adina sil current tgei che l'uniun Rumantscha Rezia Bassa porscha.

Ed aunc enzatgei: fagei reclama per noss'uniun e perschua diuven e vegl en vies contuorn che capeschan Rumantsch, d'entrar ell'uniun ed aschia far part dalla famiglia Rumantscha – engraziari fetg!

Cun la speranza che vus tuts stetties vinavon fideivels all'Uniun Rumantscha Rezia Bassa selegrel jeu gia oz sin in bien seveser alla proxima sentupada e specialmein a nossa radunonza generala a Jenins e salidel vus tuts cordialmein

Mols, il fenadur 2021, vies president

Rinaldo Caduff